



Sabtu, 12 Oktober 2024

Ogen: 1 Petrus 3: 8-9



"Mbalas Alu Pasu-Pasu"



Pusuh e me sada ruang bas dirinta si fungsina ngejabken ras merespon alu penggejapen. Kai ateta sibahan ras uga perbahanen kalak man banta, selain kulata si ngaloi, pusuh pe lit tanggapenna. Mawen respon kula ras pusuh sendalanan, adi bage sehat kita. Tapi megati la sendalanan, biberta cirem tapi pusuh ta ngandung. Adi bage banci kita la sehat, dingen kena pinakit pusuh. Kai ndia pinakit pusuh e? Sakit hati, luka batin, trauma, dendam, segat, urat si pagit bas pusuh, ras sidebanna. Rasul Petrus ngerana man jabu-jabu kalak Kristen, guna nuduhken buah kinitekenna. Pedah sikatakenna e me gelah sada arih, sada perukur. Biak si bage la banci jadi adi bas jabu la lit si surut. Inget...kalak si nandai Dibata nge ietehna alu payo, nggit surut labo tanda ketalun ntah kebodohen. Kristus ras rasul-rasul kataken kalak nge bodoh, tapi IA si muliana. Kalak si la nggit si suruten labo lit sada arih sada perukur. Jenari nina rasul Paulus, arus lit kekelengen ras kiniteruken ukur. I bas jabu mawen nggit rusur erlumba jadi nomor sada. Emaka sadar la sadar si saingen ersenina, si pandangan ersembuyak guna ndatken perhatian ras pemere si lebih. Tapi, lit kin ertina e? Iyaki nge si erbanca kurang teman arih-arih, kurang keriahen bas pulung-pulung. Kedungenna rasul nuruh kita masu-masu kalak si ncedai ukurta. Kekelengen e desken minak si mpepalem lukata, semen si ngiket persadan e arah si retak-retak gelah reh rapatna, kekelengen e enden-enden si padu sorana, erbahan senang ukurta. Keluarga banci jadi tantangan man banta. Tapi keluarga ka nge inganta mulih arah perdalinenna i doni si mbelang enda. Kita ntah keluarganta banci jadi salah ngerana, salah cara rukur, tapi ula erbalas guna si jahat, balaslah alu pasu-pasu. Sangap me kam.